

Kommunik aqqissusseqqinneq nalilersortariaqalenera pillugu apequteqaat aallaavigalugu oqallisissiaq (UKA 2019/38)

(Inatsisartunut ilaasortaq Aqqalu C. Jeremiassen, Atassut)

Akissuteqaat

(Naalackersuisut Siulittaasuat)

Inatsisartunut ilaasortaq Aqqalu C. Jeremiassen, Atassut, apequteqaat aallaavigalugu oqallinnissamik siunnersuut manna qaqimmagu Naalackersuisut qutsavigaat.

Oqaatigineqarpoq aqqissusseqqinnerup ingerlanneqarneraniilli maannakkut ukiut 10-it qaangiussimalersut. Aamma oqaatigineqarpoq aqqissusseqqinnerup sunniutaasa oqallisiginissaannut piffissangortoq. Ilanngullugu kommunit kattutsinneqarnerannut ilusiliineq toqqarneqartoq nunamut isorartuumut Kalaallit Nunaattut ittumut naleqqunnersoq.

Naalackersuisut ulluinnarni sulinerminni kommuninut tunngasut eqqumaffigisorujussuaat. Naalackersuisut aqqissusseqqinnerup sunniutai ingerlaavartumik nalilersortarpaat.

Aqqissuussaanermut isumalioqatigiissitap isumaliutissiissutaa 2005-imeersoq tunngavigalugu, kommunini suliassaqarfiit aqqissuuteqqinneqarnerat pillugu Inatsisartut inatsisaat nr. 14, 19. november 2007-imeersoq akuerineqarpoq. Taamaaliormi kommunit 18-iullutik kommunit agguagaanerat sisamaannangortillugit 1. januar 2009 aallarnerfigalugu allangortinneqarpoq. Tamatuma kingorna Qaasuitsup Kommunia 1. januar 2018 aallarnerfigalugu kommuninut marlunnut avinneqarpoq, taamaalilluni kommunit maannakkut tallimaallutik.

Kommunit maannakkut tallimangornissaata tungaanut ineriartorneq, Naalackersuisut isumaat malillugu pissusissamisoortup tungaanut ineriartornerusimavoq. Naalackersuisut isumaqarput kommunik pilersitseqqinneq inuiaqatigiinnut tamakkiisutut isigalugit sunniuteqassasoq.

Aqqissusseqqinneq pillugu oqallinneq nutaajunngilaq. 2015-imi kommunit suleqatigalugit aqqissusseqqinnerup naliliivigineqarnera Naalackersuisut ingerlappaat. Naliliinermi ilaatigut siunertaavoq, suliassat pitsaanerumik sunniuteqarluarnerumillu suliarineqartalernissaat pillugu aqqissusseqqinnermut tunngaviusut anguneqarsimanersut, paasinarsinneqarnissaa. Makkua ilaatinneqartut sammineqarput:

- Innuttaasunik sullissinermik pitsaanerumik sunniuteqarluarnerumillu pilersitsisoqassasoq.
- Inatsisitigut isumannaatsuutitsineq qaffatsinneqassasoq.
- Innuttaasut pisortanukartarnerat ajornannginnerulissasoq.

Naliliinermut nalunaarusiaq inassuteqaatinik arlalinnik imaqarpoq. Nalunaarusiaq tamatuma kingorna Inatsisartunut agguaneqarpoq. Naalakkersuisut oqaatigisinnaavaat inassuteqaatit ilai piviusunngortinneqaleruttormata, ilanngullugit aningaasartuutinik utertitsisarnernut tapiissutinullu aqqissuussinerit il.il. allanngortinneqarnerat.

Aaqqissuussaanermut isumalioqatigiissitap inassuteqaatai 2005-imeersut, neriutiginneqarsinnaasutut annertutigisumik piviusunngortinneqarsimanngitsut, Naalakkersuisut eqqumaffigaat. Tassani assersuutigalugu pineqarpoq suliassaqaarfiit kommuninut akisisussaaffinngortinneqarnerat. Suliap ingerlanera taanna immikkoortuni arlalinni naatsorsuutigineqartunit piviusunngortikkuminaannerusooq paasinarsisimagaluartoq, suliassaqaarfiit arlallit ukiuni kingullerni kommuninut tunniunneqartarsimapput. Taamaalilluni nunaqaarfinnut isorliunerusunullu inissialiortiternermut pilersaarummut aningaasaliissutit taamatullu iluarsaassinernut tapiissutit kommuninut tunniunneqarput. Aamma taaneqarsinnaavoq atualinngitsunut aamma meeqqat atuarfiinut suliassaqaarfimmi sanaartornermut suliassat tunniunneqarsimammata, taamatullu Namminersorlutik Oqartussat inissiaataasa attartortittakkat nuutsinneqarsinnaanerit sulissutigineqarluni.

Namminersorlutik Oqartussat kommunillu akornanni suliassat agguagaanerit qanoq pitsaanerpaamik aqqissuunneqarsinnaanersoq, Naalakkersuisut kommunit suleqatigalugit ingerlaavartumik misissortarpaat. KANUKOKAp atorunnaarnera kommunit suliassatigut ataqatigiissaarinerannut pitsaanngitsumik sunniuteqarsimavoq. Pingaartumik kommunit ataqatigiillutik isummaminnik Naalakkersuisunut oqariartuuteqarniarnermikkut ajornartorsuiteqarsimapput. Kommunit soqutigisaminnik ataqatigiissumik isummernissamik amigaateqarnerat taamaalillutillu isumaqatiginninniarnerni illuatungeriittut ataatsimuunnginnerat sanngiissutitut Naalakkersuisut isigaat. Naalakkersuisut neriutigaat kommunit ataatsimoorlutik ajornartorsiummut iluarsisutissamik nassaarumaartut.

Naalakkersuisut kommunit aqunneqarnerat pillugu Inatsisartut inatsisaat nr. 29, 17. november 2017-imeersumi oqartussaaqatigiinneq nukittunerulersippaat. Kommunalbestyrelsit illoqarfinni tamani najukkami ataatsimiititalianik pilersitsissasut piunasaqaataalerpoq. Taamaaliornermi innuttaasut pissusiviusuni oqaaseqartarnissaat aammalu najukkami ineriartortitsinermut sunneeqaataasinnaanissaat qulakkeerneqarpoq.

Taamatut oqaaseqarlutik Naalakkersuisut ilaasortat isumaasa tusarnissaat qilanaaraat.